



ՀԱՆԳԻՍՏ
Տ. ԽԱՉԻԿ ԱՎԱԳ ՔԱՀԱՆԱ ԿԻՐԱԿՈՍՅԱՆԻ
(1901—1981)

1981 թվականի դեկտեմբերի 19-ին Երևանում, իր բնակարանում, վախճանվում է Տ. Խաչիկ ավագ քահանա Կիրակոսյանը։

Հանգուցյալը ծնվել է 1901 թվականին Սպահանի (Իրան) Փերիա գավառի Նամակերտ գյուղում, գյուղացու ընտանիքում։

Սկզբնական կրթությունը ստացել է ծրնրնդավայրի Հովհաննյան դպրոցում։ Վաղ հասակից մասնավոր սեր է ունեցել դեպի եկեղեցական ծառայությունը։

1929 թվականին Տ. Մեսրոպ արքեպ. Տեր-Մովսիսյանից սարկավագ է ձեռնադրվում։

Այնուհետև, 1945 թվականին, ավարտելով Նոր Զուղայի Ս. Ամենաիրկիչ վանքի հոգևոր դպրոցը, Տ. Վահան արքեպ. Կոստանյանից քահանա է ձեռնադրվում և մեկ տարի պաշտոնավարում իր ծննդավայրի եկեղեցում։

1946 թվականին իր ընտանիքով և հավատացյալ իր ժողովրդով ներգաղթում է մայր հայրենիք ու երկար տարիներ քահանայագործում Սիսիանի Ս. Հովհաննես, Երևանի Ս. Զորավոր և Ս. Հովհաննես, Ապարանի Ս. Նշան եկեղեցիներում։

1957 թվականին հանգուցյալը, որպես պարտաճանաչ սպասավոր Հայ Եկեղեցու, իր երկարամյա ծառայության համար, Տ. Տ. Վազգեն Ա կաթողիկոսի կոնդակով արժանանում է ավագության պատվի և ստանում քահանայական լանջախաչ կրելու իրավունք։

Հանգուցյալի վերջին օժման և թաղման կարգը կատարվում է դեկտեմբերի 21-ին, Երևանի Ս. Հովհաննես եկեղեցում, ապա աճյունը ամփոփվում է Երևանի Կարմիր բլուր գերեզմանատանը։



Տ. Խաչիկ ավագ քահանա Կիրակոսյանը եղել է արժանավոր, հավատավոր ու համեստ սպասավորը Հայ Եկեղեցու և առհասարակ ճշմարտության իր ժողովրդին և հայրենիքին։

«Հանգուցե Տեր գիտի բազմամեայ պաշտօնի իւրոյ ի լոյս երեսաց իւրոց»։